

PEMBERITAHUAN PERTANYAAN

DEWAN RAKYAT, MALAYSIA

PERTANYAAN : BERTULIS

DARIPADA : YB PUAN RUBIAH BINTI HAJI WANG

KAWASAN : KOTA SAMARAHAN

TARIKH :

NO. SOALAN : 173

SOALAN:

YB PUAN RUBIAH BINTI HAJI WANG minta **MENTERI PERDAGANGAN ANTARABANGSA DAN INDUSTRI** menyatakan kejayaan perbincangan yang diperoleh ketika Sidang Negara ASEAN yang lalu terutamanya hubungan ekonomi antara negara ASEAN.

JAWAPAN:

Tuan Yang Di Pertua,

1. Sebagai Pengerusi ASEAN pada tahun 2015, Malaysia telah berjaya memastikan ASEAN mencapai dua keutamaan yang telah ditetapkan iaitu pembentukan rasmi Komuniti ASEAN dan pelancaran Pelan Tindakan Komuniti ASEAN 2025. Pada 21 November 2015, semasa Sidang Kemuncak ASEAN ke-27, Malaysia bersama negara-negara anggota

ASEAN yang lain telah mengumumkan secara rasminya pembentukan Komuniti ASEAN 2015 yang merangkumi 3 tonggak iaitu Komuniti Politik dan Keselamatan, Komuniti Ekonomi atau AEC (*ASEAN Economic Community - AEC*) dan Komuniti Sosio-Budaya.

2. Di bawah Komuniti Ekonomi, selama hampir lima dekad kewujudan ASEAN, pelbagai langkah yang digariskan di bawah Pelan Tindakan AEC yang telah diperkenalkan pada tahun 2007 telah berjaya dicapai, termasuklah:

- (i) penghapusan duti import ke atas 96 peratus produk dan bakinya dijangka akan dimansuhkan pada 1 Januari 2018;
- (ii) liberisasi sektor perkhidmatan yang merangkumi lebih daripada 100 sub-sektor perkhidmatan;
- (iii) menghapuskan halangan-halangan bagi sektor pelaburan;
- (iv) mengurangkan halangan-halangan bukan tarif (*Non-Tariff Barriers* (NTBs));
- (v) mengintegrasikan sektor-sektor lain seperti pengangkutan, kewangan, pertanian, telekomunikasi, pelancongan serta meningkatkan kerjasama di dalam bidang-bidang seperti galian, perhutanan dan tenaga;

- (vi) mengukuhkan kesalinghubungan (*connectivity*) melalui dasar "Open Skies" dan memudahkan pergerakan rentas-sempadan kenderaan komersial;
- (vii) memudahkan pergerakan rentas-sempadan tenaga mahir melalui "*mutual recognition arrangement*" dalam bidang kejuruteraan, arkitek, juruukur, perubatan, pergigian, kejururawatan dan akauntan; dan
- (viii) mengukuhkan kerjasama di dalam bidang hak harta intelek, dasar persaingan dan dasar perlindungan pengguna.

3. Langkah-langkah liberalisasi dan integrasi ekonomi yang telah dilaksanakan oleh ASEAN ini telah berjaya meningkatkan daya saing negara-negara anggota ASEAN khususnya dalam menjadikan rantau ASEAN sebagai sebuah pasaran tunggal dan pusat pengeluaran antarabangsa yang kompetitif. Pelaksanaan Pelan Tindakan AEC 2015 telah menyumbang kepada pengukuhan ekonomi ASEAN serta peningkatan kepada kualiti hidup rakyat.

4. Semasa mempengerusikan ASEAN pada tahun 2015, Malaysia dan ASEAN juga telah mengambil langkah-langkah untuk meningkatkan lagi usaha fasilitasi perdagangan. Malaysia bercadang untuk terus mengekalkan momentum bagi mempertingkatkan integrasi ekonomi ASEAN. Antara inisiatif-inisiatif fasilitasi perdagangan yang telah dan sedang dalam proses pelaksanaan adalah:

- (i) *Skim ASEAN-wide Self-Certification*;
- (ii) *ASEAN Single Window*;
- (iii) *ASEAN Solutions for Investment, Services and Trade (ASSIST)*;
- (iv) *ASEAN Trade Repository (ATR)*; dan
- (v) *ASEAN Customs Transit System (ACTS)*.

5. ASEAN menyadari bahawa proses integrasi ekonomi serantau merupakan sebuah proses yang berterusan. Sehubungan ini, Pemimpin-Pemimpin ASEAN telah memperakukan Pelan Tindakan AEC 2025 semasa Sidang Kemuncak ASEAN ke-27 yang lalu di Kuala Lumpur. Pelan Tindakan terbaru ini akan meneruskan lagi agenda integrasi ekonomi serantau ASEAN bagi tempoh 10 tahun yang akan datang.

6. Pelan Tindakan AEC 2016-2025 yang menggariskan langkah-langkah strategik untuk dilaksanakan di rantau ASEAN untuk tempoh 10 tahun akan datang mengandungi ciri-ciri utama seperti berikut:

- (i) **Ekonomi yang Bersepadu dan Kohesif** - memudahkan pergerakan barangan dagangan, perkhidmatan, pelaburan, modal serta buruh mahir dalam ASEAN bagi meningkatkan rangkaian perdagangan dan pengeluaran ASEAN;
- (ii) **ASEAN yang Kompetitif, Inovatif dan Dinamik** - meningkatkan daya saing dan produktiviti rantau ASEAN melalui pewujudan dasar persaingan efektif, memupuk penciptaan dan

perlindungan pengetahuan, meningkatkan penyertaan ASEAN di dalam *Global Value Chain* (GVC) serta mengukuhkan *regulatory framework* yang berkaitan;

- (iii) Kesalinghubungan dan Kerjasama Sektoral yang Diperkukuhkan - meningkatkan kesalinghubungan (*connectivity*) ekonomi pelbagai sektor iaitu pengangkutan, telekomunikasi serta tenaga seperti yang dinyatakan dalam visi dan tujuan *Master Plan on ASEAN Connectivity* (MPAC) dengan tujuan meningkatkan sumbangan sektor-sektor penting agar daya saing ASEAN secara amnya meningkat;
- (iv) ASEAN yang Berdaya Tahan, Inklusif, Berorientasi Rakyat dan Mesra Rakyat - meneruskan dan mempertingkatkan ciri ketiga AEC 2015 iaitu Pembangunan Ekonomi yang Saksama (*Equitable Economic Development*) ; dan
- (v) Pewujudan Global ASEAN - usaha-usaha untuk mengintegrasikan ekonomi rantau ASEAN ke dalam ekonomi global melalui FTA dan Perkongsian Komprehensif Ekonomi (*Comprehensive Economic Partnership - CEP*) dengan negara-negara lain. FTA dan CEP ini telah mengukuhkan kedudukan ASEAN sebagai rantau ekonomi yang terbuka dan inklusif.

7. Selain bidang-bidang utama iaitu aliran bebas barangan, perkhidmatan, pelaburan dan tenaga mahir, Pelan Tindakan AEC 2025 juga turut merangkumi bidang-bidang baru seperti amalan tadbir urus yang baik

(good regulatory practices – GRP) dan *global megatrend* serta isu-isu baru berkaitan perdagangan (*emerging trade related issues*).

8. Semasa Kepengerusian ASEAN oleh Malaysia pada tahun 2015, beberapa dokumen penting di bawah Tonggak Ekonomi telah turut ditandatangani dan dilancarkan, iaitu:

- Pelan Tindakan AEC 2025;
- Protokol bagi Meminda Perjanjian Rangka Kerja Kerjasama Ekonomi Komprehensif dan Perjanjian-perjanjian yang berkaitan di antara ASEAN dan Republik Rakyat China (RRC);
- Protokol Ketiga bagi Meminda Perjanjian Perdagangan Barangan di bawah Rangka Kerja Kerjasama Komprehensif Ekonomi di antara ASEAN dengan Republik Korea;
- Pelan Strategik Pembangunan Pengusaha Kecil dan Sederhana 2016-2025;
- *2016-2020 Work Plan to Implement the ASEAN-Canada Joint Declaration on Trade and Investment*;
- *The ASEAN Integration Report 2015 and AEC 2015: Progress and Key Achievements*; dan

- *The ASEAN Investment Report 2015.*

9. Selain daripada agenda integrasi ekonomi serantau, ASEAN turut mempertingkatkan kerjasama dengan rakan-rakan dagang utama iaitu Republik Rakyat China, Jepun, Republik Korea, India, Australia dan New Zealand serta merencanakan kerjasama ekonomi dengan Kanada, Amerika Syarikat, Kesatuan Rusia, Kesatuan Eropah dan lain-lain. ASEAN juga sedang memuktamadkan beberapa perjanjian perdagangan dengan Rakan Dialog iaitu ASEAN-Hong Kong (AHKFTA) dan Kerjasama Komprehensif Ekonomi Serantau (*Regional Comprehensive Economic Partnership –RCEP*). Usaha-usaha ini adalah penting untuk memperkukuhkan lagi hubungan ASEAN dengan Rakan Dialog dan memastikan akses pasaran berterusan bagi eksport ASEAN.